

de taia, et sapendo chi sono, li possi bandir di terre et lochi e de Venetia, con taia vivi lire 1000, morti 800, et confiscar i loro beni, iusta la forma de la parte. 147, 1, 16.

Fu posto, per li ditti, una confirmation di certa vendeda ha fato l'abadessa et monache de San Hironimo de una possession de campi 95 in vila de Bahon solo Arquà et parte in Calaan a Zuan qu. Marin da Garipoli per ducati 800, li qual danari dieno esser investidi in tanti beni mobeli con utilità dil monasterio, come apar per la sententia fata per domino Simplicio di Carmon arziprete de S. Cassan iudice delegato, fata a di 8 fevrer 1525 *ut in parte*. Ave : 126, 5, 35.

Fu posto, per li Savi dil Conseio et Terra ferma, non era sier Andrea Trivisan el cavalier, una letera a l'orator nostro in corte, notata benissimo per Gasparo Spinelli secretario, in scusation nostra col Papa di l'imprestado tolto al clero, tanto ben scritta che la copia sarà qui avanti scritta, potendola haver, con dirli el bisogno nostro dil danaro. Et sier Lunardo Emo el consier non vol se diga alcune parole, di quel bisogno etc., et parloe contro.

Et li rispose sier Francesco Donado el cavalier, savio dil Conseio et ben; *iterum* tornoe sier Lunardo Emo a parlar, più non li fo risposto. Andò le parte : 4 non sinceri, 2 de no, 18 di l'Emo, 180 di Savi.

*Item*, fo scritto un altra lettera a parte al dito orator, debbi ringratiar li cardinali Mantoa, Grimani et Pisani di le parole dite in concistorio in favor nostro. *Item* il cardinale Ridolfi ha el vescoà di Vicenza, Trani ha il vescoà di Are, Cesis ha la abatia di Ceredo, tutti sul nostro, pregandoli voglino mitigar el Papa. *Item*, parli el cardinal Corner hessendo varito, vogli far *etiam* lui quel bon officio aspetemo da lui.

Et sier Lunardo Emo non vol se nomini quei 3 cardinali, dicendo hanno dà el voto in concistorio etc. Andò la lettera : 3 di non sinceri, 0 di no, 18 di l'Emo, 165 de Sevi.

Nota. L'Emo voleva se metese uno boletin in la prima letera scritta a l'orator nostro, che se el Papa havesse, prima el receiver, scritto a la Signoria nostra come dicea voler far, non li dicesse niente.

Fu posto, per li ditti Savi, una lettera a li oratori nostri apresso Cesare, con darli aviso de la indignation ha auto el Papa de l'imprestado posto al reverendo clero, et la lettera li havemo scritto col Senato, per tanto volemo parli de questo con Cesare etc. *Item*, ne avisi, come stà la Cesarea Maestà,

dolendosi dil caso ocoresoli, et tenirne avisati de ogni successo de la diela, et in conformità se scriverà in Franza et in Anglia a li oratori nostri, con mandarli la copia di la lettera. Ave tutto il Conseio.

Fu posto, per li ditti et li Savi ai Ordeni, mandar al rezimento de Corfù ducati 500 de danari de l'imprestado dil clero, per conzar quele artelarie et a li bisogni de li, hessendo quela Camera poverissima, nè possino spender in altro, *ut in parte*, et il Collegio possi tuorli a imprestado et ubligar. Ave : 178, 2, 3.

Fu posto, per li ditti Savi, tuor di diti danari, posendosi far servir et ubligar ducati 13710 et mandarli a l'armamento per armar queste 6 galie è a banco et dar ducati 330 per una paga a sier Alexandro Bondimier capitano de le fuste et altri di le fuste. *Item*, ducati 831 per tanti spesi de più di l'ordinario, per armar di le altre galie etc., et il Colegio habbi libertà de tuorli ad imprestado. *Item* de mandar de diti danari *ut supra* ducati 500 a l'Armamento, per poter pagar a li galioti hanno servito su le altre galie, volendo tornar con queste galie si armano. Ave : 172, 3, 2.

Fu posto, per tutti li Savi una parte, non po- 288 tendo andar sier Antonio Surian dottor et cavalier electo capitano de Famagosta, per la egritudine l'ha, qual desidereria servir etc., pertanto sia preso che'l primo Gran Conseio per scurtinio et 4 man de election sia electo uno proveditor in Famagosta, in zeneral et vicecapitano in Famagosta con ducati 100 al mese a lire 6 soldi 4 per ducato per spexe sino el starà in Famagosta, et zonto sarà el capitano de li, el capitano resti proveditor fino tanto compia sier Marco Antonio Trivixan locotenente nostro, in loco dil qual hebbi intrar et *tunc* li cessi li ducati 100, havendo *solum* il salario de locotenente; et questa parte non se intendi presa, si la non sarà posta et presa in Gran Conseio. Ave : 166, 25, 1.

Fu posto, per li diti, elezer el primo Pregadi per scurtinio in questo Conseio uno proveditor nostro zeneral a Corfu et de quela insula con ducati 120 al mexe a lire 6 soldi 4 per ducato per spexe, et stii per uno anno, meni con si 8 servitori, computà uno secretario col suo fameio, habbi cura a la fortification de la terra a far far biscoti; et stii per uno anno, qual compito, senza altra licentia, possi venir a repatriar, et sia electo con pena ducati 500 a le Acque, *ut in parte*, et debbi partir con la comission li sarà data per questo Conseio.

*Item*, se mandi a Corfù domino Guido di Naldo con 200 fanti, et per la sua persona ducati 50 per